



Cjars amîs,

A mi plâs pensâ di jessi stât quartât dal vint o colât dal bec di un mierli une dì di caligo, chi tal cjanton dal curtîl tra il mûr de stale e la fereade a confin. Tor il mil nûf cent la mê vite e je sburtade fûr da un grignelut, a si è svilupade sflandorose cence mancjâ a lis cunvignis des stagjons.

O ai catalogât plui o mancul cent agns di storiis da lis fameis vivudis in cheste cjase.

Nuie al e lât pierdût.

Voaltris canais, a jeris la mê gjonde, a son passâts tancj agns, di cuant ancjemò fruts i veis lassât cheste cjase par lâ vie pal mont.

Jo o jeri la vuestre scjale par lâ sù in cîl. Tu unic mascli in fra mieç trê frutis, tu ti rimpinavis sui miei ramaçs par rivâ sul cuviert dal toblât a cjantâ a plene vôs dentri di une grande plere lis cjançons di Mina e Celentano. Voaltris frutis ogni une su la sô ramascje a niçulâsi. Mi vegin ancjemò i sgrisui al pinsîr di cuant che une e je colade cun dut il ramaç, su lis plantis di lidric, e la mame e je corude a tirâle fûr dal fueam e dai fîcs in marmelade. Nuie mâl, dome une bote tal cûl e il vistît dut tacolât. No tu stevis in te piel a fuarce di ridi.

Ce bieî ricuarts! Nissun a ju à rimplaçâts.

La ultime Istât seis vignûts in visite a cheste dimore viere, o ai cucât i vuestris sentiments, la nostalgjie di moments passâts in chest curtîl cumò desert cence nancje un cjan o un cocodâ di gjaline o un mierli a becotâ chei doi fîcs imbalsamâts dal soreli di Avost.

Mi veis cjalât a dilunc, lagrimis cidinis a colavin su lis vuestris musis grispadis. Lis mêis fueis, coladis prime de Sierade a fasevin un tapêt zâl sot i vuestris pîts.

I varès volût cjapâus ducj tai miei ramaçs come une volte e platâus cuintri il gno biel fueam vert, donâus lis mêis pomis dolcis, magari cussì no.

La vuestre vignude mi à regalât ancjemò un an di vite, cumò al è rivât il moment dai salûts.

Us lassi il gno testament spirituâl, lis clâfs di jentrade lis cognossis.

Al vuestri clickpinsîr si spalanche la barconete e ta un marilamp a comparissin imagjinis e sunôrs

da lis bielis zornadis passadis a zuiâ tal gno grim.

Mandi a ducj par simpri,

il vuestri figâr

**di O.Zete**

**#252**